

COMUNICATO n. 2240 del 18/08/2025

Projet Banda Ultra Lèria: ajornament sui neves Comuns trentins arjonc da aost 2025

Cianacei l é coleà co la rei publica en fibra otica

[Ladino] Dal scomenz de aost la rei publica en fibra otica l'à arjont l Comun de **Cianacei** e si **1590 unitàdes imobiliaries**. Con chest paisc de Fascia ades i é **158 i Comuns trentins** olache rua la tecnologia **FTTH (Fiber To The Home)**. L coleament **FTTH** l arsegurea la soluzion miora sul marcià per staboltà e velocità, dajan l met de portèr la **fibra otica** diretamente te la cèses. Per i raions più isolé, la modalitá **FWA (Fixed Wireless Azess, via radio)** l é na auternativa segura che la dèsc dutun n bon azess a la **banda ultra lèria**. Se tegnon cont de duta doi la technologies, i Comuns coleé co la **Ftth** e **Fwa** i rua a **162** su n total de **166**.

L **Projet Banda Ultra Lèria (BUL)**, portà inant da **Infratel** e tel **Trentin** metù en esser da **Open Fiber**, en colaborazion con la **Provinzia autonoma de Trent e Trentino** **Digitèl**, l à l obietif de smendrèr l digital divide ti raions bienc. Più avisa **Trentino Digitèl** l à metù a la leta infrastructures desche la condotes de cavi, col didèr coscita a smendrèr debel i cos e i tempes de realizazion de la rei publica. De gra a la infrastrutura publica en fibra otica, la families e la fi rmes (en particulèr cheles turistiche) de **Cianacei** pel ades se emprevaler de na coleament ultraveloce, stabol e fidàbol.

Per meter en esser l servije, i sentadins i pel fèr aldò de la istruzions cassot:

1. Verifichèr se l numer de cèsa l resulta esser corì dal servije: vèrda più avisa l sit de **Open Fiber**, a chesta piata <https://openfiber.it/verifica-copertura/>
2. Cerner fora l operador e l contrat co la tarifa che se vel
3. Manèr ite la domana de ativazion a la firma che se à cernù.

Per aer didament i utenc i pel se oujer a **Open Fiber** tras l servije dedicà a la leta sul link:

<https://openfiber.it/contattaci/>

Per aer informazions più avisa su la difujion de la fibra otica tel **Trentin** l é a la leta l portal

www.trentinoinrete.it

Chest auter vèrech l testimoniea l empegn de portèr l'inovazion digitèla a la comunanzes del post, col arsegurèr na conescion che va dantfora i tempes per n **Trentin** semper più coleà.

Traduzion di Servijes Linguistics e Culturèi del Comun general de Fascia

(cdt)